

Na osnovu člana 48. stav 1. tačka 2. Zakona o prometu otrova ("Službeni list R BiH", br. 2/92 i 13/94), a koji se, saglasno članu IX. 5.(1) Ustava Federacije Bosne i Hercegovine primjenjuje kao federalni propis, federalni ministar zdravstva donosi

PRAVILNIK

O DOPUNAMA PRAVILNIKA O TEHNIČKIM I SANITARNO-HIGIJENSKIM USLOVIMA KOJE MORAJU ISPUNJAVATI ORGANIZACIJE UDRUŽENOG RADA KOJE SE BAVE PROMETOM OTROVA

Član 1.

U Pravilniku o tehničkim i sanitarno-tehničkim uslovima koje moraju ispunjavati organizacije udruženog rada koje se bave prometom otrova ("Službeni list R BiH", br. 2/92 i 13/94) (u daljnjem tekstu: Pravilnik), a koji se, saglasno članu IX 5.(1) Ustava Federacije Bosne i Hercegovine primjenjuje kao federalni propis, iza člana 20., dodaju se novi čl. 21a, 21b, 21c, 21d. i 21e., koji glase:

"Član 21a.

Utvrđivanje ispunjenosti uvjeta prostora, opreme i kadra za obavljanje prometa otrovima, u smislu odredbi Pravilnika, obavlja Federalno ministarstvo zdravstva (u daljnjem tekstu: Ministarstvo), saglasno članu 18. Zakona o prometu otrova ("Službeni list R BiH", br. 2/92 i 13/94), a na osnovu podnijetog dokumentovanog zahtjeva privrednog društva, ustanove odnosno fizičkog lica - obrtnici koji obavljaju djelatnost prometa otrova, samostalno u vidu zanimanja.

Uz zahtjev iz stava 1. ovog člana prilaže se:

- rješenje o registraciji privrednog društva odnosno ustanove izdato od nadležnog općinskog suda, ukoliko je podnosilac zahtjeva pravno lice,
- ovjerenu fotokopiju identifikacionog dokumenta, ukoliko je podnosilac zahtjeva fizičko lice - obrtnik koji obavlja djelatnost prometa otrova samostalno u vidu zanimanja,
- naznačenje sjedišta i tačnog mjesta prometovanja otrovima,
- sanitarna saglasnost na projekt, lokaciju i upotrebu objekta u kojem se vrši skladištenje i prometovanje otrovima, izdato u smislu člana 177. Zakona o zdravstvenoj zaštiti ("Službene novine Federacije BiH", broj 29/97),
- dokaz o ispunjavanju uvjeta zaštite na radu, protupožarne zaštite, kao i zaštite okoline,
- dokaz o vlasništvu poslovnog prostora objekta u kojem se vrši skladištenje i prometovanje otrovima, odnosno ugovor o zakupu objekta u kojem se vrši skladištenje i prometovanje otrova,
- spisak opreme sa atestom proizvođača,
- spisak stručnog kadra sa urednom ličnom dokumentacijom zaposlenika (diploma o završenom fakultetu u oblasti hemije, tehnologije, farmacije, medicine, veterine, biologije, agronomije ili šumarstva, završenoj srednjoj školi odgovarajućeg smjera, uvjerenje o položenom stručnom ispitu u struci, kao i potvrda o radnom iskustvu),
- dokaz o uplati federalne takse,

- dokaz o uplati naknade za rad Stručne komisije.

Član 21b.

Po prijemu uredno dokumentovanog zahtjeva iz člana 21a. ovog Pravilnika, federalni ministar zdravstva (u daljnjem tekstu: ministar zdravstva) imenuje Stalnu stručnu komisiju (u daljnjem tekstu: Komisija) od najmanje dva člana sa zadatkom da kod podnosioca zahtjeva izvrši neposredan uvid, te utvrdi ispunjenost uvjeta prostora, opreme i kadra za obavljanje djelatnosti prometa otrovima.

Komisija iz stava 1. ovog člana dužna je sačiniti zapisnik o izvršenom pregledu koji je sastavni dio dokumentacije na osnovu koje se izdaje odobrenje za obavljanje prometa otrovima u smislu člana 18. Zakona o otrovima.

Komisija odgovara za istinitost podataka navedenih u zapisniku.

Članovima Komisije pripada naknada za rad, čiju visinu utvrđuje ministar zdravstva posebnim rješenjem.

Troškove izvršenog pregleda iz stava 2. ovog člana snosi podnosilac zahtjeva.

Visinu troškova iz stava 5. ovog člana utvrđuje ministar zdravstva posebnim rješenjem.

Član 21c.

Na osnovu podnijetog zahtjeva, a po provedenom postupku, Ministarstvo je obavezno donijeti rješenje kojim se odobrava obavljanje djelatnosti prometa otrovima, odnosno rješenje o odbijanju zahtjeva, u roku od 90 dana od dana prijema uredno dokumentovanog zahtjeva.

Ukoliko Ministarstvo od podnosioca zahtjeva zatraži dopunu dokumentacije ili dodatna objašnjenja, rok iz stava 1. ovog člana prestaje teći od dana kada je zatražena dopuna dokumentacije ili dodatno objašnjenje i traje do ispunjenja zahtjeva Ministarstva.

Rješenje iz stava 1. ovog člana je konačno u upravnom postupku i protiv istog se može pokrenuti upravni spor kod nadležnog suda, saglasno propisima o upravnim sporovima.

Član 21d.

Ministarstvo vodi evidenciju izdatih odobrenja za obavljanje prometa otrovima.

Član 21e.

Privredno društvo, ustanova, odnosno fizičko lice - obrtnik koje obavlja djelatnost prometa otrovima samostalno u vidu zanimanja, dužno je redovno obavještavati Ministarstvo o svim promjenama u pogledu prometovanja otrovima, odnosno o svim promjenama podataka na osnovu kojih je izdato odobrenje za obavljanje djelatnosti prometovanja otrovima.

Postupak evidentiranja promjena u odobrenju iz stava 1. ovog člana, provodi Ministarstvo na osnovu dokumentovanog zahtjeva privrednog društva, ustanove, odnosno fizičkog lica - obrtnika koje obavlja djelatnost prometovanja otrovima samostalno u vidu zanimanja."

Član 2.

Odredbe ovog Pravilnika primjenjivat će se i na zahtjeve koji su podnijeti Ministarstvu prije dana stupanja na snagu ovog Pravilnika, a nisu okončani izdavanjem rješenja o odobrenju obavljanja djelatnosti prometa otrovima.

Član 3.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Ministar
prim. dr. **Safet Omerović**, s. r.